

BOSNA I HERCEGOVINA
Udruženje Pomorsko društvo u Bosni i Hercegovini

Broj:09/IB/19
Sarajevo, 19.03.2019. godine

URED PREDSJEDNIKA REPUBLIKE HRVATSKE
PO PRESTANKU OBNAŠANJA DUŽNOSTI
Predsjednik Republike Hrvatske 2000-2010
Gospodin Stjepan Mesić, predsjednik
Zagreb, Grškovićeve 13
E mail adresa: ured@stjepanmesic.hr

Gospodine Predsjedniče Mesić,

Udruženje Pomorsko društvo u Bosni i Hercegovini je osnovano 2007. godine s ciljem očuvanja suvereniteta i teritorijalnog integriteta Bosne i Hercegovine, te ostvarenje svih njenih prava u Jadranskom moru i pomorstvu općenito, koja joj pripadaju.

Neposredni razlog za osnivanje Pomorskog društva je činjenica da je Republika Hrvatska donošenjem Pomorskog zakonika (1994. i 2004.) proglasila svoj državni suverenitet na pomorskoj teritoriji Bosne i Hercegovine, na način da su ključne odredbe zakonika za navedeno stanje prepisane iz zakona SFRJ, te je na taj način Republika Hrvatska sebe identificirala kao jedinog nasljednika u ovom dijelu Jadranskog mora isključujući Bosnu i Hercegovinu, u potpunosti. Sljedstveno tome, Republika Hrvatska ne želi da ratificira Sporazum o državnoj granici između Bosne i Hercegovine i Republike Hrvatske, koji su potpisali Predsjednik Republike Hrvatske Franjo Tuđman i Predsjedavajući Predsjedništva Bosne i Hercegovine Alija Izetbegović (Sarajevo 30. 7. 1999. godine), jer je u suprotnosti sa odredbama Pomorskog zakonika. U prilogu je pismo (i prilog pismu) od 18.12.2018. godine upućeno Profesoru Ljubiću, zastupniku u Hrvatskom Saboru, u kojem ima više detalja o pripajanju bosanskohercegovačkog pomorskog teritorija i načina kako je to moguće riješiti. Dodatno tome, prilažemo i pismo upućeno Evropskoj komisiji nakon što su pokušali odbraniti regularnost odluke o finansiranju izgradnje Pelješkog mosta (Euro 357 mil.).

Povod pisma je **Vaša izjava u Bakuu od 17.03.2019. godine (Fena)**, koja se odnosi na nepromijenjivost granica Bosne i Hercegovine i Kosova, i takve pokušaje ste nazvali iluzornim. Naravno, to se na prvi pogled dojmima kao veoma pozitivan i zaštitnički stav. Međutim, detaljna analiza kompletne Vaše izjave, inače dobro osmišljene, uzimajući u obzir sve navedeno u priloženim dokumentima, pokazuje sasvim nešto drugo, na šta smo mi u Pomorskom društvu veoma osjetljivi, a uz to, u toj oblasti veoma stručni i obrazovani.

Osnovne teze analize izjave, bez uključenja informacija iz priloženih dokumenata:

- (i) Bosna i Hercegovina s Kosovom nije, niti može biti izolovan slučaj na Balkanu, niti imaju išta zajedničko u pogledu granica, u odnosu na međusobno neriješene granične odnose Republike Srbije i

Republike Hrvatske i njihove neriješene granice prema Bosni i Hercegovini, Sloveniji, Makedoniji, Kosovu itd.

- (ii) Ove dvije zemlje (Srbija i Hrvatska, nespomenute u izjavi) drže kompletnu političku situaciju Zapadnog Balkana u svojim rukama, a posebno Bosnu i Hercegovinu, jer je to jedino oko čega se politički slažu.
- (iii) Spomenuti Dragan Čović i Milorad Dodik su ovdje viđeni kao „poslušni politički mudraci“ koji žive i rade u zamišljenim političkim vertikalama (Mostar-Zagreb-Bisel i Banja luka-Beograd-Moskva), koje im daju sigurnost i moć. Istina, oni su pametniji od njihovih partnera (nalogodavaca) u Zagrebu i u Beogradu, jer u kontinuitetu, dokazivo potvrđuju „da je u životu sve prolazno, a da je samo lični interes vječan“.
- (iv) Etno-nacionalistički koncepti Srbije i Hrvatske kao osnovna zadaća pomenute dvojice političara, je ključni problem Bosne i Hercegovine naspram građana, nosilaca suvereniteta ove države, koji baštine evropske vrijednosti uređenja života i organizacije države. Ovaj etno-nacionalistički koncept je najbolje ocijenila neprecipijelna (i kontrodiktorna) Predsjednica Grabar-Kitarović prilikom reakcije na izjavu A. Tajanija (*“Historijski revizionizam i iredentizam apsolutno su neprihvatljivi. Temelji Evropske unije i njenih institucija ne počivaju na takvim vrijednostima“*). Postojeća ideologija iredentizma s dvije strane, sa različitim tehnikama provedbe, za Bosnu i Hercegovinu je najveća temeljna opasnost, koja je uz to, i vertikalno veoma jako postavljena. Vodeći političari ove ideologije iz Srbije i Hrvatske se često gube, kad su u Bosni i Hercegovini, pa ne znaju je su li u inostranstvu ili u svojoj zemlji.
- (v) Shodno prethodnom, nevjerovatno je, da je u izjavi tako prenaplašeno da su za sve probleme nastale u ratu, poslije i sada (sa zapada) u Bosni i Hercegovini krivi građani ove države (Mate Boban, Dragan Čović...), a da se ni u jednom djeliću izjave ne spominje pozicija i odnos države Hrvatske i njenih političara. Na taj način se potpuno negira realnost i ignoriše presuda haškog tribunala (dec. 2017.).

Pomorsko društvo se u potpunosti slaže sa dijelom izjave: „Svi oni koji danas žele oteti dio Kosova ili BiH žive u velikoj zabludi.“ Međutim, to ne odgovara stvarnosti i mi se kao što se vidi iz priloženih dokumenata borimo da vratimo već oteto (pomorski teritorij Bosne i Hercegovine).

Gospodine Predsjedniče Mesić,

Shodno navedenom, bili bismo Vam izuzetno zahvalni da razmotrite Vašu poziciju i stav prilikom usvajanja Pomorskog zakonika (1994. i 2004.), te Vaše mišljenje danas o svemu ovome kad smo svi saglasni „da svi oni koji žele oteti dio Bosne i Hercegovine žive u velikoj zabludi“.

Mi vjerujemo u Vaš iskren odnos prema Bosni i Hercegovini i njenim građanima, te Vas i Vaše prijatelje molimo da nam pomognete u ovoj našoj borbi za očuvanje suvereniteta i teritorijalnog integriteta Bosne i Hercegovine, kao i ostvarenje svih njenih prava u Jadranskom moru i pomorstvu općenito.

Primate iskrene izraze našeg poštovanja,

Prilog: kao u tekstu


dr.sc. Izet Bajrambašić, predsjednik
Pomorskog društva u Bosni i Hercegovini